

Refleksi al-quran

Oleh ABDULLAH BUKHARI
ABDUL RAHIM

AL-HAFIZ

Pensyarah di Jabatan
Tilawah al-Quran,
Pusat Bahasa, UIAM
dan Timbalan
Presiden Murshid.



JIKA ia hanya sehelai kain kosong tanpa makna, masakan Ja'afar bin Abi Talib r.a. sanggup kehilangan kedua-dua belah tangannya mempertahankan panji atau bendera tentera Islam dalam perang Mu'tah. Jika ia sekadar kain kosong, masakan Allah gantikan kedua tangan Ja'afar dengan dua sayap sehingga beliau bebas berterbangan dalam syurga bersama para malaikat."

Itu antara kelebihan yang dimiliki seorang sahabat Rasulullah. Beliau adalah sepupu Nabi SAW dan antara orang terawal memeluk Islam.

Dalam perang Mu'tah melawan tentera Rom, beliau kehilangan dua tangan kerana mempertahankan panji tentera Islam. Lalu Allah gantikan kedua-dua tangannya itu dengan dua sayap.

Hal ini sebagaimana diceritakan oleh Rasulullah dalam sabda baginda erti: "Wahai sekalian manusia, sesungguhnya Ja'afar (sekarang bersama malaikat Jibril a.s. dan Mikail a.s. Dia punya dua sayap sebagai ganti dua tangannya (yang hilang dalam perang Mu'tah). Dia baru sahaja memberi salam kepadaku (dari alam barzakh)." Oleh kerana itu beliau dinamakan sebagai al-Tayyar (insan yang terbang) dalam syurga kelak." (Mustadrak al-Hakim)

Apa mesej yang boleh kita pelajari daripada hadis ini? Apa yang saya nampak adalah signifikan panji atau bendera yang membawa simbol besar dalam sebuah negara.

Dalam sebuah perang, panji menjadi tanda kesatuan tentera. Fokus dan moral tentera kekal segar dan utuh jika mereka lihat bendera pasukannya kekal teguh. Ini antara sebabnya mengapa Ja'afar sanggup bergadai nyawa demi mempertahankan panji atau bendera tentera Islam.

Rasulullah sendiri akan menggerakkan tentera Islam dengan panji tertentu. Ada panji yang dipegang orang Muhajirin juga orang Ansar. Pemegang panji juga dipilih secara khusus sehingga ia menjadi idaman semua sahabat.

Ja'afar putus tangan pertahan bendera



BENDERA adalah simbol warganegara yang perlu disanjung tinggi.

INFO

- Cintakan bendera yang menjadi cerminan cinta negara adalah selari dengan tuntutan Islam.
- Sahabat sanggup kehilangan kedua-dua belah tangannya mempertahankan bendera Islam dalam peperangan.
- Bukan sahaja di dunia, malah di akhirat Allah akan tempatkan manusia mengikut bendera atau panjinya.
- Usah babitkan bendera bagi melepaskan kemarahan berasas politik.
- Bendera atau simbol warganegara merupakan nikmat yang perlu disyukuri.

Dalam perang Khaybar, Rasulullah bersabda erti: "(Esok) Aku akan berikan panji (bendera) perjuangan kepada seorang lelaki yang mana Allah akan beri (kita) kemenangan bawah pimpinannya (panji itu kemudiannya diserahkan kepada Ali bin Abi Talib)." - Sahih Bukhari & Muslim

CERMINAN CINTA NEGARA

Cintakan bendera yang menjadi cerminan cinta negara tidak pernah bercanggah dengan Islam. Rasulullah yang punya surat beranak Mekah, berduka hati ketika terpaksa meninggalkan Mekah.

Madah gundah baginda disebut dalam hadis erti: "Demi Allah sesungguhnya engkau (bumi Mekah) adalah bumi Allah yang terbaik dan



paling dicintai Allah. Jika bukan kerana aku diusir darimu, maka aku tidak akan sama sekali keluar darimu." - Sunan Tirmizi & Ibn Majah

Sedih baginda kemudiannya dipujuk Allah dengan firman-Nya erti: "Sesungguhnya Allah yang mewajibkan kepadamu (beramal dan menyampaikan) al-Quran (wahai Muhammad sehingga terusir keluar dari Mekah) sudah tentu akan menyampaikan engkau lagi kepada apa yang engkau ingini dan cintai (Mekah). Katakanlah (kepada kaum yang menentangmu): "Tuhanmu amat mengetahui akan sesiapa membawa hidayah petunjuk dan sesiapa pula berada dalam kesesatan yang nyata." (al-Qasas :85)

Bukan sahaja di dunia, malah di akhirat juga Allah akan tempatkan manusia mengikut bendera atau panjinya sebagaimana sabda Nabi SAW erti: "Aku adalah penghulu anak Adam pada hari kiamat kelak. Ini bukanlah kesombongan (sebaliknya suatu penghormatan daripada Allah). Pada tanganku kelak akan ada 'panji' pujian." - Sunan al-

Tirmizi

Pengkhianat dan pendosa juga punya benderanya tersendiri sebagaimana sabda Nabi SAW maksudnya: "Sesungguhnya para pengkhianat (berjanji) akan diletakkan baginya panji (khusus yang menjadi penanda supaya seluruh makhluk) pada hari kiamat (tahu tentang penghianatannya)." - Sunan al-Tirmizi & Ibn Majah

SANGGUP TERBALIKKAN BENDERA?

Bagi konteks zaman moden, semua negara berdaulat di dunia punya bendera yang membawa lambang tertentu yang mencerminkan 'wajah' negara tersebut.

Bendera juga menjadi lambang patriotisme seorang warganegara. Nikmat bendera hanya akan dihargai setelah ia hilang.

Penulis pernah bertemu seorang pemuda dari sebuah negeri kecil di Rusia. Kerakyatannya ditarik oleh kerajaan negara itu

kerana masalah politik keluarganya yang kompleks.

Akibatnya, dia sekarang menumpang teduh di Malaysia menerusi panji Pertubuhan Bangsa-Bangsa Bersatu bagi Pelarian (UNHCR) sebagai pelarian politik.

Akibat kehilangan hak kerakyatan, dia sudah tiada negara atau 'tiada bendera' untuk dibanggakan. Sukar untuknya meneruskan hidup di negara asing.

Hendak mohon pekerjaan, tiada siapa mau mengambilnya kerana status 'tiada bendera' yang melekat pada dirinya. Saya percaya jika dia diberikan kerakyatan baharu oleh mana-mana negara di dunia, dia pasti akan sujud syukur beralaskan bendera negaranya yang baru.

Oleh itu, sungguh malang jika ada rakyat Malaysia yang tidak pandai bergurau atau menyatakan protes dengan mengangkat Jalur Gemilang secara terbalik.

Jika anda marah dengan orang politik sekalipun, jangan pula mangsakan Jalur Gemilang yang saya ibaratkan sebagai 'pakaian terhormat ibu pertiwi'.

Tujukan kemarahan anda kepada orang politik melalui kertas undi dalam pilihan raya dan bukannya dengan mengoyak atau memijak pakaian terhormat ibu pertiwi Malaysia itu.

Orang politik boleh bertukar ganti, namun Jalur Gemilang tetap utuh di puncak tanpa mengira siapa yang mengisi kuasa politik. Betulkan otak anda! Jika marah jangan terbalikkan Jalur Gemilang, tetapi 'terbalikkanlah' orang politik dalam pilihan raya akan datang.